



Amaran!

Pihak Jabatan Agama Islam Perak tidak bertanggungjawab terhadap sebarang penambahan ayat selain daripada kandungan khutbah yang dikeluarkan.

## "KEBURUKAN FITNAH: PENGAJARAN DARI PERISTIWA AL-IFKI"

31 Januari 2025 / 1 Syaaban 1446

الْحَمْدُ لِلَّهِ<sup>1</sup> الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ، لِيُظْهِرَهُ عَلَى الدِّينِ كُلِّهِ وَكَفَىٰ بِاللَّهِ شَهِيدًا. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ<sup>2</sup> وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>3</sup> أَوْصِيكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ.

**Jemaah yang dirahmati Illahi,**

Marilah kita tingkatkan ketakwaan ke hadrat Allah SWT dengan melaksanakan segala perintah dan meninggalkan semua larangan Nya, mengikhhlaskan setiap amal, semoga kita mendapat taufik dan hidayah serta diperkukuhkan iman mengabdikan diri kepada Allah Yang Maha Esa. Mimbar akan menyampaikan khutbah bertajuk:

### "KEBURUKAN FITNAH: PENGAJARAN DARI PERISTIWA AL-IFKI"

Firman Allah SWT, ayat 6 surah al-Hujurat:

﴿يَا أَيُّهَا الَّذِينَ ءَامَنُوا إِن جَاءَكُمْ فَاسِقٌ بِنَبَأٍ فَتَبَيَّنُوا أَن تُصِيبُوا قَوْمًا بِجَهْلَةٍ فَتُصِيبُكُمْ عَلَىٰ مَا فَعَلْتُمْ

نَدِمِينَ ﴿٦﴾

Bermaksud: "Wahai orang yang beriman, jika seseorang yang fasiq datang kepadamu membawa suatu berita, maka selidikilah (untuk menentukan) kebenarannya agar kamu tidak mendatangkan musibah kepada suatu kaum dengan perkara yang tidak diingini disebabkan kejahilan kamu (mengenainya) sehingga akhirnya kamu menyesali perbuatanmu itu!

Berpandukan takrifan Kamus Dewan Bahasa dan Pustaka, fitnah bermaksud tuduhan jahat yang disembarkan secara lisan atau tulisan, bertujuan untuk memburuk-burukkan seseorang atau sesuatu pihak. Perbuatan menyebarkan dusta berunsur fitnah, jelas hukumnya haram berpandukan firman Allah SWT dalam surah al-Jasiah ayat ke-7:

<sup>1</sup> Memuji Allah

<sup>2</sup> Selawat ke atas Nabi Muhammad SAW

<sup>3</sup> Pesan Taqwa

## ﴿وَيْلٌ لِّكُلِّ أَفَّاكٍ أَثِيمٍ﴾

Bermaksud: Dan celakalah bagi setiap pendusta yang banyak berdosa.

Bersempena tarikh 1 Syaaban 1446 pada hari ini, mimbar menyeru sekalian jemaah untuk kita menelusuri kisah yang berlaku dalam bulan Syaaban pada tahun keenam Hijrah. Peristiwa tersebut terkandung dalam sebuah hadis, mencatatkan peristiwa *al-Ifki* (peristiwa pembohongan); peristiwa yang memberikan pelbagai pengajaran akan keburukan fitnah, serta cara menghadapinya, berpandukan ajaran Islam.

Peristiwa '*Hadis al-Ifki*' merujuk kepada fitnah yang dilemparkan terhadap isteri Rasulullah SAW, Sayidatina Aisyah RA; berlaku semasa perjalanan pulang Baginda SAW dan para sahabat daripada perang *Bani Mustaliq*. Semasa perjalanan tersebut, Sayidatina Aisyah RA tertinggal di belakang, ditemui oleh sahabat bernama Safwan bin Mu'attal RA. Beliau telah mengambil tanggungjawab mengiringi Sayidatina Aisyah RA membawanya ke hadapan untuk dapat menyertai semula ahli-ahli rombongan yang lain. Namun dalam kalangan orang-orang munafik yang diketuai Abdullah bin Ubai telah menyebarkan fitnah, menuduh Sayidatina Aisyah RA melakukan zina bersama Safwan bin Mu'attal RA.

Fitnah tersebut telah menggugat suasana harmoni dalam kalangan masyarakat Madinah. Ada para sahabat yang mempercayai fitnah tersebut, malah turut menyebarkannya. Lalu berlaku suasana gelisah dan tidak harmoni susulan fitnah yang disebarkan, berlarutan hampir sebulan lamanya, mengakibatkan Baginda SAW merasa tidak tenteram. Ketika menghadapi ujian tersebut, Rasulullah SAW melakukan siasatan untuk mendapatkan kebenaran. Baginda merujuk para sahabat - menyoal Sayidatina Aisyah RA, di samping memohon petunjuk daripada Allah SWT. Akhirnya persoalan terjawab – fitnah terungkai apabila Allah SWT menurunkan wahyu melalui surah an-Nur ayat 11, sekali gus membersihkan maruah Sayidatina Aisyah RA dan nama baik Safwan bin Mu'attal RA. Firman Allah SWT, surah an-Nur ayat 11:

﴿إِنَّ الَّذِينَ جَاءُوا بِالْإِفْكِ عُصْبَةٌ مِّنكُمْ لَا تَحْسَبُوهُ شَرًّا لَّكُم بَلْ هُوَ خَيْرٌ لَّكُمْ لِكُلِّ أَمْرِ مِّنْهُم مَّا  
أَكْتَسَبَ مِنَ الْإِثْمِ وَالَّذِي تَوَلَّى كِبْرَهُ مِنْهُمْ لَهُ عَذَابٌ عَظِيمٌ﴾



Bermaksud: Sesungguhnya orang yang membawa berita dusta itu adalah dalam kalangan kamu (juga). Janganlah kamu mengira berita itu buruk bagi kamu bahkan itu baik bagi kamu. Setiap orang daripada mereka akan mendapat balasan daripada dosa yang dilakukannya. Dan sesiapa antara mereka yang mengambil bahagian terbesar dalam menyebarkannya antara mereka, dia mendapat azab yang besar (di dunia dan di akhirat).

### **Jemaah yang dilimpahi rahmat Illahi**

Mimbar menyenaraikan beberapa pengajaran dari peristiwa *al-Ifki*:

**Pertama: Keburukan fitnah** – perbuatan memfitnah dicatat sebagai dosa besar; fitnah boleh menjejaskan maruah, mengakibatkan berlaku perselisihan faham antara suami isteri, juga boleh menjejaskan hubungan sesama ahli keluarga, jiran tetangga dan rakan sekerja; fitnah boleh menyebabkan ummah bertambah keliru, bertelagah, bermusuh dan berpecah belah; fitnah juga boleh menjejaskan keharmonian masyarakat, di samping membantut usaha untuk memajukan rakyat dan membangunkan negara.

**Kedua: Menyelidiki maklumat yang diterima** - Islam mengajar kita untuk terlebih dahulu memeriksa sesuatu berita sebelum mempercayai, dan jangan pula secara gopoh turut berperanan menyebarkannya, agar kita terlindung daripada terlibat melakukan dosa besar dalam rangkaian menyebarkan fitnah.

**Ketiga: Sabar dan tawakal ketika menghadapi fitnah** - Rasulullah SAW dan Sayidatina Aisyah RA mempamerkan sifat kesabaran yang tinggi ketika menghadapi ujian difitnah; menyerahkan diri dan yakin kepada pertolongan dan keadilan Illahi.

**Keempat: Mengutamakan perpaduan dan keharmonian** – perpaduan dan keharmonian kurniaan Illahi tidak seharusnya dijejaskan melalui perbuatan fitnah memfitnah dan kerja-kerja menyebarkan berita palsu. Ummah harus bijak mengenal pasti dan menapis setiap berita yang disampaikan, dengan mengutamakan ukhuwah Islamiah dalam semangat perpaduan dan kerukunan bernegara.

**Kelima: Balasan bagi penyebar fitnah** - Allah SWT menetapkan azab yang berat kepada mereka yang terlibat mencetus fitnah, juga kepada mereka yang bersubahat menyebarkan fitnah. Oleh itu, hendaklah berhati-hati terhadap apa yang kita ucapkan dan sebarkan dengan mengambil ingatan sabda Rasulullah SAW:

## لَا يَدْخُلُ الْجَنَّةَ نَمَّامٌ

Bermaksud: "Tidak masuk syurga orang yang menyebarkan fitnah (mengadu domba).

(Hadis Riwayat Bukhari)

### Jemaah Rahimakumullah,

Mutakhir ini, fitnah, berita palsu dan penipuan berlaku secara berleluasa dalam kalangan umat Islam. Ada pihak yang menjadikan tabiat mencetuskan fitnah tanpa bukti kukuh, dan ada pula pihak yang begitu dangkal mudah mempercayai berita tanpa diselidiki kebenarannya, malah turut terlibat meluaskan sebarannya. Rasulullah SAW telah memperingatkan ummah agar berhati-hati sebelum bercakap mengenai perkara yang tidak diketahui kebenarannya. Sabda Rasulullah SAW:

إِنَّ الْعَبْدَ لَيَتَكَلَّمُ بِالْكَلِمَةِ مَا يَتَّبِعُ فِيهَا يَزُلُّ بِهَا فِي النَّارِ أَبْعَدَ مِمَّا بَيْنَ الْمَشْرِقِ

Bermaksud: "Seorang hamba apabila dia bercakap tentang perkara tanpa diselidiki (akan kebenarannya), maka dia akan tergelincir ke dalam neraka yang jauhnya adalah sejauh arah timur".

(Hadis Riwayat Al-Bukhari)

Mimbar menasihati para jemaah untuk menjauhkan diri daripada perbuatan fitnah dan menyebarkan fitnah kerana perbuatan tersebut merupakan dosa besar yang akan menerima azab yang keras daripada Allah SWT. Fitnah boleh mengundang pelbagai kesan buruk menyebabkan seseorang buta dalam menilai kebenaran. Perbanyakkan doa kepada Allah SWT apabila menghadapi ujian difitnah, di samping berhati-hati dalam setiap tindakan agar tidak terlibat menjadi pihak yang menyambung rangkaian fitnah.

بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ  
وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ  
الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ  
وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



## Khutbah Kedua

الْحَمْدُ لِلَّهِ<sup>4</sup> حَمْدًا كَثِيرًا طَيِّبًا مُبَارَكًا فِيهِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ  
أَنَّ سَيِّدَنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ<sup>5</sup> وَعَلَى آلِهِ وَأَصْحَابِهِ  
أَجْمَعِينَ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ<sup>6</sup> وَكُونُوا مَعَ الصَّادِقِينَ.

### Muslimin yang dirahmati Allah,

Mimbar menyeru para jemaah agar tetap berpegang kepada aqidah Islamiah berteraskan Ahli Sunnah Waljamaah, yang menjadi warisan Rasulullah SAW, sahabat dan tabiin serta yang mengikutinya dari kalangan *Asyairah Maturidiah*. Jagalah hubungan dengan Allah SWT dan sesama manusia. Makmurkan rumah-rumah Allah dengan istiqamah mengerjakan ibadah, terutama solat fardu berjemaah. Perbanyakkan selawat dan salam ke atas Junjungan Besar Nabi Muhammad SAW.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا<sup>7</sup>  
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ عَلَى  
مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ حَمِيدٌ  
مَجِيدٌ. اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ، وَأَصْلِحْ ذَاتَ بَيْنِهِمْ  
وَأَلِّفْ بَيْنَ قُلُوبِهِمْ وَاجْعَلْ فِي قُلُوبِهِمُ الْإِيمَانَ وَالْحِكْمَةَ، وَثَبِّتْهُمْ عَلَى مِلَّةِ رَسُولِ اللَّهِ ﷺ.  
اللَّهُمَّ أَعِزِّ الْإِسْلَامَ وَالْمُسْلِمِينَ وَأَنْصُرْ إِخْوَانَنَا وَأَخَوَاتِنَا وَأَطْفَالَنَا فِي فَلَسْطِينَ، وَاحْفَظْ  
أَهْلَهَا وَأَنْصُرْ جُودَهَا وَدَمِّرْ أَعْدَانِكَ أَعْدَاءَ الدِّينِ يَا رَبَّ الْعَالَمِينَ.

**Ya Allah! Ya Rabbal 'alamin!** Jauhi kami daripada perbuatan memfitnah, menyebarkan fitnah, atau menjadi orang upahan melakukan kerja-kerja fitnah. Bimbing kami untuk berakhlak mulia sama ada di dunia nyata atau dunia maya. Lindungilah kami daripada menjadi mangsa fitnah, atau terpalit dengan kesan buruk fitnah; tabahkan hati orang-orang yang menghadapi ujian difitnah, dan Engkau bimbing hamba-hamba Mu yang begitu taksub melakukan fitnah untuk segera bertaubat lalu berhenti terlibat atau bersubahat dengan kerja-kerja memfitnah.

<sup>4</sup> Memuji Allah

<sup>5</sup> Selawat ke atas Nabi Muhammad SAW

<sup>6</sup> Pesan Taqwa

<sup>7</sup> Ayat Al-Quran

<sup>8</sup> Doa untuk Kaum Muslimin



**Ya Mannan! Ya Razzaq!**, berkatilah hamba Mu yang melaksanakan zakat, wakaf dan sedekah. Kurniai mereka rezeki yang berlipat ganda, serta sucikanlah harta dan jiwa mereka; jauhi golongan *fuqara* dan *masakin* daripada kekufuran dan kefakiran yang berpanjangan.

**Ya Aziz! Ya Qahhar!** Lindungi Masjid al-Aqsa daripada dimusnahkan oleh rejim Zionis Israel dan limpahi ihsan Mu membela dan mengurniakan kemenangan kepada rakyat di bumi Palestin yang sedang menderita kerana perbuatan zalim rejim Zionis Israel.

**Ya Mu'min! Ya Muhaimin!** Limpahi rahmat Mu agar negara kami berada dalam keadaan selamat dan makmur, dijauhi daripada bencana dan malapetaka, rakyatnya hidup dalam suasana aman dan muhibah.

**Ya Maalikal Mulk!**, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba Mu yang amanah dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

**Ya Muiz! Ya Adzhiim! Ya Kabiir!**, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah, dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ  
عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ  
الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ ﴿فَاذْكُرُوا اللَّهَ الْعَظِيمَ يَذُكُرْكُمْ،  
وَاشْكُرُواهُ عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلِذِكْرِ اللَّهِ أَكْبَرُ، وَاللَّهُ يَعْلَمُ  
مَا تَصْنَعُونَ.